

**Talamdan sa Mga Mensahe
alang sa Full-time Training sa Fall Term sa 2024**

**LINANGKOB NGA HISGOTANAN:
ANG MAHINUNGDANONG MGA PUNTO SA KAMATUORAN SA MGA SULAT NI PABLO—
GALACIA**

Mensahe 16

**Ang Pagkaanaay Mga Timaan ni Jesus ug Pagkinabuhi sa Kinabuhing Linansang sa Krus
aron Makapahimulos sa Grasya ni Cristo nga Sangkap sa Espiritung Taghatag-og-kinabuhi nga Naa sa Atong
Espiritu, Makapapangalagad Nato ni Cristo nga Grasya sa Dios ngadto sa Panimalay sa Dios**

Basahong Kasulatan: Gal. 6:17-18; Juan 1:14, 16-17; Heb. 10:29; Rom. 5:10, 17, 21; Heb. 4:16

- I. **Ang grasya mao si Cristo mismo nga atong pagpahimulos—ang grasya mao ang nabanhawng Cristo nga Espiritung taghatag-og-kinabuhi nga gawasnong naghatag sa Iyang Kaugalingon kanato, nahimong tanan nato, ug nagbuhat sa tanan sa sulod nato, pinaagi nato, ug alang nato—Juan 1:14, 16-17; Isa. 55:1; 2 Cor. 1:8-9, 12; Gal. 2:20; 2 Tim. 4:22; 1 Cor. 15:10:**
- II. **Ang Bag-ong Tugon kasaysayan sa grasya nga mao ang nahikay ug nahingpit nga Tulo-usang Dios nga naglihok ug nabuhi sa sulod nato aron atong mapahimuslan; sa Bag-ong Tugon, padayon tang makadawat sa Espiritu sa grasya nga dagayang grasya, nagsapawsapaw nga grasya, aron mapalingkod sa trono ang grasya ug maghari sa sulod nato aron makahari ta sa kinabuhi— Juan 1:14, 16-17; 1 Cor. 15:45b; Heb. 10:29; Rom. 5:10, 17, 21; Heb. 4:16:**
 - A. Giingnan sa manulondang si Gabriel si Maria sa Lucas 1:28 nga, “Pagkalipay, ikaw nga gigrasyahan! Nag-uban nimo ang Ginoo”; niingon siya sa versiculo 30 nga, “Ayaw kahadlok, Maria, kay gigrasyahan ka sa Dios”; nagpadayag kini nga pagduaw sa Dios ang grasya nga mosulod sa tawo, magpabilin sa tawo, ipanganak diha sa tawo, mausa sa tawo, ug mahimo man nganing tawo aron magpahimugso og kahibulongang persona, ang Dios-tawo—vv. 78-79; 2 Tim. 4:22; Gal. 6:18.
 - B. Ang pagkapiniyalan (pamatigayon) sa grasya sa Dios gihatag “kanako alang ninyo” (Efe. 3:2) aron makapamulong ta sa uban sa “mga pulong sa grasya” (Luc. 4:22) aron “makahatag kinig grasya sa mga nakadungog” (Efe. 4:29); ang pagkahuman ug pagkahingpit sa pagtukod sa balay sa Dios naa ni Cristo nga ulohang bato sa grasya sa Dios (Zac. 4:7).
 - C. Kinahanglan mahimo tang maayong mga piniyalan sa nagkadaiyang grasya sa Dios, nga namulong sa mga pulong sa grasya ingon nga mga oraculo sa Dios ug nangalagad gumikan sa kusog ug gahom sa grasya, nga gisangkap sa Dios—1 Ped. 4:10-11; Luc. 4:22.
 - D. Gipakita sa Biblia nga ang Cristohanong kinabuhi alang sa iglesiahanong kinabuhi kinabuhi gyong dunay mga pako sa agila, nga nagtimaan sa gahom sa pagkabanhaw ni Cristo, sa gahom sa kinabuhi sa Dios, nga nahimong grasya sa Dios nga giaplikar kanato nga mahimong gahom nato aron makalihok ug mapanalipdan ta—Isa. 40:31:
 1. Unsa ta ug unsay buhaton nato dili gyod unta segun sa kaalam, kusog, ug kahimoan nato kondili pinaagi sa grasya sa Dios—2 Cor. 1:12; 4:7; 1:12; 12:9; 1 Cor. 15:10.
 2. Sa usa ka bahin, ang grasya sa Ginoo mao ang gahom aron makalihok ta; sa laing bahin, panalipod nato ang grasya sa Ginoo ingog tagoanan sa Iyang presensya—Sal. 17:8; 31:20; 57:1; 63:7; 91:4.
 3. Ang pagtambayayongay sa upat ka buhing binuhat sa Ezequiel 1:5, nga hulagway sa hiniusang Cristo, naa sa diosnong gahom, sa diosnong kusog, ug sa diosnong sangkap sa grasya kay ang mga pako sa agila mao may palagianan nga makatambayayongay sila ug makalihok ingog usa—vv. 6, 9, 11; Exo. 19:4; Isa. 40:31; 2 Cor. 12:9; 1 Cor. 15:10.

- E. Ang kataposang versiculo sa Biblia mao ang Bugna 22:21, nga nag-ingon, “Mag-uban ang grasya ni Ginoong Jesus sa tanang balaan. Amen”; natapos ang tibuok Biblia sa grasya nga makapasinati nato sa malangkobon-sa-tanan nga Cristo ug makapaambit nato sa Tulo-usang Dios aron mahimo tang walay kataposang hiniusang pagpadayag Niya aron matuman ang Iyang walay kataposang tuyo, para maka-pahimulosay Siya ug kita sa bug-os ug kompletong pahulay sa eternidad.

III. Sa maanaa nato ang mga timaan ni Jesus, mapahimuslan nato ang grasya ni Cristo—Gal. 6:17-18:

- A. Ang mga pulong *mga timaan* sa versiculo 17 nagpasabot sa mga timaan nga gimarka sa mga ulipon nga magpaila sa ilang mga tag-iya; diha ni Pablo, nga ulipon ni Cristo (Rom. 1:1), ang mga timaan, sa pisikal nga bahin, mga ulat sa mga samad nga nadawat niya sa matinumang pag-alagad niya sa iyang Agalon (2 Cor. 11:23-27).
- B. Sa espirituhanong bahin, nagtimaan ang mga timaan ni Jesus sa mga ilhanan sa kinabuhing gikinabuhi ni Pablo, sa kinabuhing sama sa gikinabuhi ni Ginoong Jesus dinhi sa yuta; kanunayng gilansang sa krus kanang kinabuhia (Juan 12:24), nagbuhat sa kabubut-on sa Dios (6:38), wala magtinguha sa kaugalingon niining himaya kondili sa himaya sa Dios (7:18), ug mapasakopon ug masinugtanon sa Dios, bisan hangtod sa kamatayon sa krus (Fil. 2:8); salamat sa Ginoo nga sa nadawat nato si Cristo nga atong kinabuhi, nadawat nato ang Iyang kinabuhing mapasakopon ug masinugtanon ug ang kinabuhing makapakinabuhi nato nga bug-os nga alang sa Dios ug makatagbaw Niya (Lev. 1:3, 6:8-13; Efe. 4:20-21).
- C. Kon naa nato ang mga timaan ni Jesus ug nagkinabuhi ta sa kinabuhing linansang sa krus, mapahimuslan nato ang grasya ni Cristo nga sangkap sa Espiritung taghatag-og-kinabuhi diha sa atong espiritu aron ikapangalagad nato si Cristo nga grasya sa Dios ngadto sa panimalay sa Dios—Fil. 3:10; 2 Cor. 4:10-11; Efe. 3:2; Mat. 24:45-47.

IV. Mapadayonon gyod tang moduol sa trono sa grasya aron makadawat tag kaluoy ug makakaplag og grasya nga tabang sa panahon sa panginahanglan; moduol gyod ta sa nagharing Cordero-Dios nga diosnong tinubdan ug mobukas sa atong kaugalingon gikan sa kahiladman sa atong pagkatawo aron mapuno Niya nga grasya—Heb. 4:16; Bug. 22:1; Juan 1:16:

- A. Sa maghari ang grasya sa sulod nato, magbuot nato ang grasya sa kinabuhi, ug maghari ta ni Satanas, sa sala, ug sa kamatayon aron magbatasan sa kinabuhi sa Lawas aron madugmok si Satanas ilalom sa atong mga tiil—Heb. 4:16, Rom. 5:21; 8:2; 12:1-3; 16:20.
- B. Ang pagdagaya sa grasya mao ang grasyang nidagaya sa adlaw-adlaw natong kinabuhi sa hingpit nga pagkaila sa Dios ug ni Jesus nga atong Ginoo; dato, nagkadagaya, ug madagayaon ang grasya sa Dios sa Iyang pamatigayon—1 Ped. 1:2b; 2 Ped. 1:2; Juan 1:16; Efe. 1:6-8; 2:7; Rom. 5:17, 21; 1 Tim. 1:14; Bug. 22:21:
 - 1. Modagaya ang grasya kanato pinaagi sa atong mga pag-antos, paglimiti, ug kaluyahon; ang grasya mao si Cristo nga tigpas-an sa atong kabug-at; magkadaghan ang atong mga kabug-at, magkadaghan sab ang kahigayonan nga makasinati ta ni Cristo nga grasya—2 Cor. 12:7-9; itandi sa 1:12, 15.
 - 2. Ang pagpahimulos sa Ginoo nga grasya naa sa mga nahigugma Niya—Efe. 6:24; Juan 21:15-17; 1 Ped. 1:8.
- C. Maglabi nga duna tay tin-awng langit, tin-awng pakig-ambitay sa Ginoo, diha sa pakig-ambitay sa Lawas, labi sad tang mailalom sa Iyang trono, nga maghimo natong langitnong mga linya sa elektrisidad nga magpalatay sa langitnong trono sa nagbuot nga presensya sa Dios nganhi sa yuta—Ezeq. 1:22, 26; Bug. 22:1-3; 1 Hari 10:18; Rom. 5:17; Mat. 24:14.
- D. Ang grasya ni Ginoong Jesucristo nga madagayaong sangkap sa Tulo-usang Dios mapahimuslan nato pinaagi sa paggamit sa atong tawhanong espiritu—Heb. 10:29b; Gal. 6:18; Fil. 4:23; Filem. 25; 2 Tim. 4:22.
- E. Ang pulong sa Dios mao ang pulong sa grasya—Buh. 20:32; Col. 3:16; itandi sa Jer. 15:16.

- F. Masinati nato ang nahikay nga Tulo-usang Dios nga grasya sa kinabuhi sa magtigom ta uban ang mga balaan diha sa sukaranan sa pagkausa—Sal. 133:3; 1 Ped. 3:7; Buh. 4:33; 11:23.
- G. Makasinati ta sa Ginoo nga nagtubo ug igo-sa-tanan nga grasya nato taliwala sa mga pag-antos ug pag-sulay—2 Cor. 12:9.
- H. “Ang Dios sa tanang grasya”—nga nagtawag sa mga magtutuo ngadto sa Iyang walay kataposang himaya—maghingpit, magtukod, maglig-on, ug magpasukad nila pinaagi sa ilang mga pag-antos; kining “tanang grasya” mao ang “tinuod nga grasya sa Dios,” nga niini mosulod ug magbarog gyod ang mga magtutuo—1 Ped. 5:10, 12.
- I. Pinaagi sa gahom sa grasya, sa kusog sa grasya, ug sa kinabuhi sa grasya mahusto ta tali sa Dios ug sa usag usa; mosangpot sa grasya ang objectibong pagkamatarong, ug magpalugwag subjectibong pagkamatarong ang grasya—Heb. 11:7; Rom. 5:17, 21.

V. Ang grasyang hingpit nga gilaoman sa mga magtutuo ipadangat kanila inigpadayag ni Jesucristo—1 Ped. 1:13; itandi sa Gen. 6:3, 5, 8, 11, 13; Mat. 24:37-39:

- A. Ang grasyang ipadangat kanato inigpadayag ni Jesucristo nagpasabot sa kaluwasan sa kalag nga kahingpitan sa hingpit nga kaluwasan sa Dios—1 Ped. 1:5, 9-10; Mat. 25:21, 23:
 - 1. Ang grasyang gihatag kanato diha ni Cristo gihatag kanato sa wala pa magsugod ang kalibotan—2 Tim. 1:9; Tito 2:11.
 - 2. Ang Dios, nga naa sa sinugdan, nahimong unod sa panahon ingon nga grasya aron madawat, mapanag-iya, ug mapahimuslan sa tawo—Juan 1:1, 14, 16-17.
 - 3. Ang nahikay nga Tulo-usang Dios, nga nahingpit ingon nga Espiritung malangkobon-sa-tanan, naghatag-og-kinabuhi, ug nagpuyo sa sulod, nahimong Espiritu sa grasya nga naa sa atong espiritu—1 Cor. 15:45b; 2 Cor. 3:17; Heb. 10:29; Gal. 6:18; Fil. 4:23.
- B. Bukas gyod unta ta nga mga sudlanan adlaw-adlaw aron mahimong mapadayonong mga tigdwat sa grasya ug bug-os ug hingpit gyong ipatumong ang atong paglaom ning grasyaha—Rom. 5:17; 1 Ped. 1:13.
- C. “Mag-uban ang Ginoo sa imong espiritu. Mag-uban nimo ang grasya” (2 Tim. 4:22); kon dili nato masinati ang pagkaanaa sa Ginoo sa atong espiritu ug mawad-an sa presensya sa grasya, maanaa ang pagkadaot sa iglesia.

VI. Naghatag ang Dios og grasya sa mga mapaubsanon, apan nagsanta Siya sa mga mapahitas-on—1 Ped. 5:5:

- A. Diha sa iglesihanong kinabuhi, magbakos gyod tang tanan og pagpaubos ngadto sa usag usa aron makapahimulos ta sa Dios nga taghatag-og-grasya—itandi sa Juan 13:3-5.
- B. Magluwas nato sa tanang matang nga pagkadaot ang pagpaubos ug magdapit sa grasya sa Dios, samtang maghimo natong kinalabwang buangbuang ang garbo—Sant. 4:6; Sal. 138:6; Prov. 29:23.
- C. Andam gyod unta tang ipaubos diha sa gamhanang kamot sa Dios sa pagdisiplina Niya ug iitsa nato sa Dios ang atong kinabuhi ug ang kabalaka niini, kay mahigugmaon ug matinumanon Siyang nagtagad nato—1 Ped. 5:5-7; itandi sa Sal. 55:22.

VII. Ang kinahingpitan ug kinataposang produkto sa grasya sa Dios sa Iyang pamatigayon mao ang Lawas ni Cristo nga balak sa Dios nga mahimong Bag-ong Jerusalem nga kahingpitan sa pagkamatarong sa Dios sa bag-ong mga langit ug bag-ong yuta; dili malimitahan ang kadato sa Dios mismo nga atong mapahimuslan ug ipasundayag kini sa eternidad—Efe. 2:7-10; 2 Ped. 3:13; Bug. 22:21.